

Un otro Palabra pa **Bondat** ta **Dignidat**. **Dignidat** ta loke **SEÑOR** a duna na **Ruth** e moabita.

I a sosodé ku mei anochi e hòmber a spanta, i a bira wak; i mira, tabatin un muhé drumí na su pia. I el a puntra: "Ta ken bo ta?" I el a kontestá: "Ami ta **Ruth**, bo sirbidó. **Si tòg ta bo deber pa sòru pa mi, lo bo n' kasa ku mi?** ('*lo bo n' kasa ku mi?*; literalmente: *mi ke pa bo **tapa mi ku rant di bo mantel***. Segun *kustumbernan di e tempu ei e akto ei tabata nifiká ku e hòmber a aseptá pa kasa ku e muhé*)

E ora ei Boaz a bisa: "Ku SEÑOR **Bendishoná** bo, mi yu. Awor mas ku nunca bo a demostrá bo **Fieldat**, pasobra bo por a skohe un otro hòmber mas hóben ku mi, pober òf riku, ma bo no a hasié. I awor, mi yu, no tene miedu. Lo mi hasi pa bo kiko ku bo pidi, pasobra tur e hendenan di e stat aki sa ku bo ta un muhé **Ekselente**. I awor ta **Bèrdat** ku mi ta un famia yegá; sinembargo, tin un famia mas yegá ku mi. Keda awe nochi, i ora dia habri, si e kier **Redimí** bo, ta bon; laga é **Redimí** bo. Ma si e no kièr **Redimí** bo, e ora ei, manera **SEÑOR** ta biba, ami lo **Redimí** bo. Keda drumi te mainta." (**Ruth 3:8-13**)

Den **Torah**, ku ta e **Lei**, tin yen di regla ku **SEÑOR** a stipulá. Den totalidat tin **613 regla; Mandamentu** skirbi den e promé 5 buki nan di Tèstament Bieu. Un regla tabata ku ora ta kosechá, e kosecha di boso tera, no kosechá te den skinanan di boso kunuku, ni rekohé loke resta di boso kosecha; boso mester laga nan pa esun den nesesidat i pa e estranhero, pagano. (**Levítiko 23:22**). Un otro regla tabata e **Lei** di **Redimí** pa liña di un famia (**Deuteronomio 25:5-10**) i **Lei** di **Redimí** pa e tera. (**Levítiko 25:47-48**).

Awor **tapa mi ku rant di bo mantel** ta nifiká en efektivu, tapa mi ku bo **613 Mandamentunan**, pasobra tur **Israelita** tabata tin **mantel di orashon** ku nan tabata tin bisti tur ora. Asina aki dor di **Dignidat**, ku ta nifiká sigui loke tin pone den **Lei** pa un **Israelita**, un moabita a drenta **Reino di Dios**. **Dignidat** ta trata un hende ku **Honor** i **Rèspèt**. **Dignidat** ta tambe sigui e reglanan stipulá pa **Dios Tata**. Awor si abo no tin e **Obediènsia** pa **Dios** su **Mandamentunan** ta kon abo kièr risibí **Dios Su Unshon, Sabiduria** i **Abundansia**?

Asina **Boaz** a kasa ku **Ruth**, i el a bira su esposa. E tabatin **Relashon** kuné. I **SEÑOR** a hasi ku el a konsebí, i el a duna lus na un yu hòmber. E ora ei e muhénan a bisa Noemí: "**Bendishoná** sea **SEÑOR**, Kende no a lagabo sin un **Redentor** awe; i ku su nòmber bira famoso na **Israel**. Ku e lo ta pa bo tambe un **Restoradó** di bida i un **Sostenedó** di bo behes; pasobra bo suegra, kende ta **Stimabo** i ta mihó pa bo ku shete yu hòmber, a duna lus na djé." (**Ruth 4:13-15**).

Boaz a **Redimí** Noemí su tera i Noemí su liña di famia i asina **Ruth**, un pagano, a risibí **Dignidat** i a konvertí bin bira parti di e **Reino Israelita**. Ora **nos** bai wak den e liña di antepasadonan di **Kristu Hesus** nos ta mira ku **Ruth**, un pagano, tabata e mama di **Obed**. **Obed** tabata tata di **Isai**, ku tabata tata di **rei David**. Nos tur sa kon e hòmber siegu a sklama: "**Hesus, Yu di David**, tene **Mizerikòrdia** ku mi!" (**Lukas 18:38**).

Loke no ta skirbi den Beibel ta ku **Boaz** un hòMBER di edat avansá a biba solamente 1 dia i 1 anochi ku su esposa **Ruth**. E siguiente dia despues di matrimonio **Boaz** a fayedé, pero no promé ku el tabatin **Relashon** ku **Ruth** su esposa. Es desir **Boaz** a kumpli ku e mishon ku **Dios Tata** tabata tin pa **Ruth** dor di **Respetá** i **Honra** e **613 Mandamentunan**. Awor ora abo mustra **Dignidat** i kumpli ku e **Mandamentunan** di **Dios**, abo tambe lo risibí **Dios Su Unshon**, **Sabiduria** i **Abundansia**!

19 mei 2017

Sea Bendishoná den e Amor di Yeshua Mesias

Rev. Remsly L Riley